

En memoria da

## Paul Benedetg Venzin-Deplazes, Camischolas

20. 10. 78  
nr. 86

(Corr.) «Gl'ei stabiliu ch'il carstgaun hagi inagada da murir.» — Quels plaids ein puspei severificai inagada da pli culla mort da nies vischin Paul Benedetg ch'ha concludiu il viadi terrester culla finiziu dil gliendisdis dils 18 da settember 1978, e rendiu si'olma al Scaffider.

Per scriver in pign necrolog sur dalla veta passada da nies car defunct vulein nus dar in pign sguard el vargau. Paul Benedetg ei naschius a Selva, pia dadens gl'uaul, ils 14 d'avrel 1914, ed ei staus il pign e cratsch da 16 affons dils geniturs Flurin e Gada Venzin, nata Paly. Pia enamiez in pign mund selvadi e spuretg da suffels e nevadas e lavinas, zatgei nundescribibel da gliez temps, essend ch'ei era aunc fatg neginas ustonzas encunter ils eveniments dalla natira. Oz vesess ei ora in tec auter. Ses geniturs fagevan il pur, e quei cun tgierp ed olma, e da gliez temps eran ils funs aunc buca mess ensemens entras megliazioni etc. Na, cheu deva ei da runtgar e recaltgar in toc tscheu ed in toc leu. Basta, malgrad tutta stentas e meinsvart prigulusa lavour era la cunten-

tientcha pli gronda che en nos dis da segira surabuldonza.

Cun ina gronda famiglia sco ei fuvan, deva ei segir da studegiar co e cum per spisgientar ina aschi vasta tablada. Mo cun sefidar sin quel sisura en lavour ed oraziun, che ha segiramein buca muncau, ein ils dis ed onns, bials e meins bials da sgarschur e temas adina vargai. E lura aunc schar studegiar in fegl, nies bien sur Flurin oz resignaus cheu a Camischolas. E cun quella caschun seigi era aunc engraziau da cor per tut il bien che il sur frar da nies preziau defunct e sia casarina Josefina han fatg viers quella famiglia cun prender perfin en casa-ervenda in u l'auter affon per cuort ne pli liung temps e nua che nies defunct ha astgau retscheiver mintga di Niessegner ord ils mauns de siu sur frar Flurin Venzin. Per tut — en num dil defunct — in cordial e cauld Dieus paghi. Era ha il defunct giu aunc duas soras che han giu elegiu la clamada claustral a Glion, nua che ina viva oz sco sora Coletta. Cheu ha ei segiramein tuccau bia fastedis e quitaus pils buns geniturs, nua che il rap vegneva viults duas gadas avon che dar ora.

Havend il defunct giu finiu las scolas primaras, eis el serendius a Camischolas alla scola secundara. Vesend ils buns talents da quei mattatsch, ein ils geniturs era buca senuspi da tarmetter il Paul Benedetg on Clastra a scola. Ed era el haveva l'intenziun da continuar las classas, mo gia suenter treis onns da latin haveva Niessegner preparau outras vias. E muort la sanadad ha el bugen ne nuidis stuiu returnar a Selva e metter per adina ils cudischs da studi sin cruna, e quei cun grev cor. Quei ha el inagada giu confidau al scribent da siu necrolog. — El era bein da statura empau zaclins e falomberts, e magari in tec in da disclegetgscoinsdi. Edel saveva bein avunda che il carstgaun seigi sin quest mund buca mo per raccoltar rosas senza spinas. — E quellas han era buca muncau al car defunct en sia veta sco tier tuts mortals.

S'avanzaus els onns veseva era el che ei mava buca bein da adina star persuls. Ed el ei sedecidius da fundar sez famiglia. Ed aschia che el ha anflau sia futura consorta en la persuna de Ida Deplazes, da s. Benedetg/Sumvitg, ch'ei stada ina fideivla e premurada consorta en casa sco en nuegl. La lètg ei stada benedida da buca meins che tredisch affons: tschun feglas ed otg feglis, ch'ein oz en bunas posiziuns Ils affons han era fatg bien cun lur geniturs ed il moribund ha giu la ventira da haver tuts a casa sper siu letg, e saviu dar adia a tuts cun complein e saun giudezi entochen sia davosa sura. Bein ina gronda grazia, che vegn buca concedida a tuts.

Mo beingleiti ei il vitg da Selva daventaus ina unfrenda dil grond barschament digl onn 1949, nua che era nies defunct ei vegnius d'ina ura sin l'altra senza tetg sco era ils auters vischins. Ins ha lura — bein aschi spert sco pusseivel — dau agid als donnegiai e reconstruiu ina nova dimora a nos vischins dadens gl'uaul. Quei ei tut stau bi ed endretg da segidar cul proxim e concarstgaun. Mo era quella ventira ha buca cuzzau aschi ditg, ch'ins ei vegnius danovamein surpris d'immenzas lavinas e nevadas digl onn 1951. E cheu ei era puspei nies defunct vegnius tratgs viaden ella neiv, nua che la lavina ei vegnida sper casa e clavau ora e staus satraus in pèr uras dalla cozza da neiv. Bein tut caussas che sminuevan sias forzas, aschia che el ha pauc ni bia adina pitiu da quellas stremlblidas.

En fatscha a quels eveniments dalla natira eis el sedecidius da translocar sia casa da Selva a Camischolas, nua che el possedeva era bia bials praus. Ed el ha giu vina vonla devise: urar e luvrarpersia famiglia. Dils fatgs privats e communals haveva el adina grond interess e persequitava tgei che cuori e passi. Siu pli grond plascher ei bein adina stau la musica, e da saver sunar e cantar laud a Diu. El ha onns en ed onns ora sunau l'orgla per accumpagnar il survetsch divin, e quei a Selva, Rueras ed il davos a Sedrun. Ins saveva adina sefidar sin il Paul Benedetg, sche ei



muncava en in liug ni l'auter igl orgalist, e quei probabel per pauc ne nuot, ne forsa per in Dieus paghi.

Tier sepulturas saveva quei esser da mesa stad ne sil pli ault fenar, cheu vegneva ei iu, sco era dil chor viril e mischedau era el commember, e segir ha el buca savens muncau tier las emprovas. El era in um da tradiziun fundada, profundamein reli-gius e da bien exempel. En quei connex san ins dir «Verba movent – exempla trahunt. –» Ed aschia han ins saviu seper-schuader tier sia sepultura ils 21 da set-tember 1978 el bi santeri a Sedrun, ina baselgiada sco buca savens. Era ils chors-baselgia han priu cumiau da lur fideivel e premurau commember cun duas canzuns. Bien vischin, Ti has ussa finiu e sas dir cun s. Paul «Battiu il bien combat – salvau la cardientscha – finiu la cuorsa terrestra. Als restai anavos admettein nus nossa pli cordiala condolenza e Niessegner vegli schar scalarir ad el ed a nos cars defuncts la glisch perpetna. RIP

G.F.